

相關音檔可至東安國中網頁>公告事項下載

【百善孝為先】黃詩婷 原作

頭擺人講：「一等人忠臣孝子，兩件事讀書耕田。」昔時賢文講「千萬經典，孝義為先。」𠂇這兜從細讀個三字經裡肚也有講「首孝悌，次見聞。」還過，青年守則第二條「孝順為齊家之本。」這兜做下都係提醒𠂇「百善孝為先！」做人盡基本個斯係做一個賢孝个子女。

「食水愛念水源頭，食果子愛拜樹頭！」係同𠂇講，愛做一個知得感恩个人。「感恩」真重要，知得感恩个人，定著係一個有孝爺哀个人。該愛仰脣做，正係有孝呢？𠂇除撇愛煞猛讀書、照顧好自家个身體、莫分爺哀愁慮以外，平常時定著愛加減攏手做屋家事，像洗碗、撿摯、掃地泥、抹地泥、晾衫，自家个書桌同間房愛整理淨俐，做下係𠂇這兜細人做得著个輕可事，毋好推懶，毋好同兄弟姊妹奸來奸去³²。人講个：「家和萬事興！」無毋著，共屋家人毋好冤家羅債，毋好動啊著斯惡擊擊，愛聽阿爸阿姆个話，毋好同爺哀堵堵擰擰！恁泥，家庭斯會和和諧諧，也正會幸福！

³² 奸來奸去：音 gien+ loi` gien+ ki`；形容互相推諉、不願接受的樣子。

記得有一日，吾奶在簷脣下同鄰舍譖哆，好恬恬，𠂇聽著阿奶啟大氣在講：「唉，枉費𠂇恁惜吾孫、孫女，厥等緊大嘅緊毋講客話，厥這兜講個話，𠂇又聽無麼識，這下啊，兩子阿奶嘅變都無麼個話好講了³³！」𠂇聽了後，目汁差一屑跌落來！踴緊，𠂇又惱著阿爸長在咄𠂇講：「細人毋講客話，阿公婆都會跪來罵！」知著自家實在不應該！過後，𠂇斯盡量用客話去同吾爹吾奶打嘴鼓。漸漸，看著厥等緊來緊有笑容，𠂇正知，若敢開口多講客話，斯會緊講緊滑溜，斯使得同阿爹阿奶溝通，同厥等較有話講。原來，講客話也係有孝個一種表現哦！

往語講：「千跪萬拜一爐香，毋當生前一碗湯。」無毋著，𠂇等毋好等下次擺大漢了賺錢正來有孝，驚怕到該央時，想愛有孝斯赴毋著了！愛做一個有孝个子女，毋係用嘴講講啊咧斯使得，係愛對平常時个生活裡肚做起，愛對這下做起勢！

³³ 表完成的語尾助詞。大埔腔有 le+、le`、lio+.....等不同讀音，讀者可依文章情境，自由詮釋發揮。以下同此注釋說明。